

Hronika / Chronik

Zaključci

Sa sjednice radnog sastava Centra za balkanološka ispitivanja Akademije nauka i umjetnosti Bosne i Hercegovine održane 19. septembra 2005. godine

Prisutni: akademik Dževad Juzbašić v.d. direktor, prof. dr. Blagoje Govedarica, urednik Godišnjaka CBI, dr. Veljko Paškvalin i dr. Zdravko Marić, naučni saradnici, te stručne saradnice Tamara Sarajlić-Slavnić i Melisa Forić. Sjednicom je predsjedavao akademik Dževad Juzbašić.

Dnevni red:

1. Rad i perspektive Centra za balkanološka ispitivanja;
2. Priprema Godišnjaka CBI XXXIV/32;
3. Razno

Ad. 1

Akademik Juzbašić podnio je izvještaj o proteklim aktivnostima Centra. Pri tome su naglašeni problemi stručnog kadra, ponovnog aktiviranja članova Centra i pospješivanja istraživačkog rada. Naznačeno je da bitan korak u tom pravcu predstavlja naša prijava Federalnom ministarstvu obrazovanja i nauke na konkurs za naučnoistraživački rad sa projektom novih arheoloških i zaštitnih istraživanja na Ošanićima kod Stoca. Ukoliko sredstva budu odobrena, planirana istraživanja na Ošanićima će biti obavljena u 2006. godini pod rukovodstvom dr. Zdravka Marića i uz angažman stručne saradnice Melise Forić. Nosilac projekta bio bi prof. dr. Blagoje Govedarica.

Istaknute su aktivnosti vezane za publikovanje Godišnjaka CBI kojim se naš Centar, za sada, u najvećoj mjeri prezentira domaćoj i međunarodnoj naučnoj javnosti, te je naglašena potreba za daljim redovnim izdavanjem ovog časopisa.

Važan preduslov za pospješivanje aktivnosti Centra je osposobljavanje radnog sastava angažovanjem mladih stručnjaka. U tom smislu pozitivno je ocjenjeno zaposlenje stručne saradnice Melise Forić, za sada na šest mjeseci, a očekuje se uspjeh na konkursu Zavoda za zapošljavanje čime bi se radni odnos produžio na godinu dana. Posebno povoljna okolnost je djelovanje iskusnih naučnih radnika dr. Paškvalina i dr. Marića, njihovo učešće u Redakciji i sadržaju Godišnjaka, te njihov rad sa mladim saradnicama Tamarom Sarajlić-Slavnić i Melisom Forić.

U daljoj diskusiji je izneseno da Centar za balkanološka ispitivanja od samog osnivanja ima specifičnu dvostruku organizacionu strukturu, koja podra-

zumjeva jedno relativno usko radno jezgro sa stalno zaposlenim saradnicima sa jedne strane, i redovne članove koji, iako zaposleni u drugim institucijama, intenzivno saraduju sa Centrom i učestvuju u ostvarivanju njegovih naučnih programa i projekata, sa druge strane. Zahvaljujući takvoj konstituciji Centar je bio u stanju da se prihvati mnoštva opsežnih naučnoistraživačkih i publicističkih poduhvata, čije je uspješno izvršavanje doprinijelo velikom ugledu ove institucije u domaćim i međunarodnim razmjerama. Jednoglasan je zaključak da bi tu tradiciju i takav način rada trebalo u najvećoj mogućoj mjeri obnoviti i dalje razvijati. U tom smislu je naglašeno da se Centar, kao istraživačka organizacija internacionalnog ranga sa preko četrdeset godina kontinuirane aktivnosti, treba više institucionalizovati, odnosno da je neophodno poraditi na većem angažmanu matične Akademije nauka i umjetnosti Bosne i Hercegovine, prije svega u kontekstu izdavanja Godišnjaka Centra. Pri tome se misli na finansijsku i organizacionu potporu unutar planskog godišnjeg budžeta.

U svrhu dalje stabilizacije Centra predloženo je da akademik Juzbašić umjesto funkcije v.d. direktora preuzme funkciju direktora Centra za balkanološka ispitivanja.

U kontekstu organizacije i osposobljavanja radnog sastava Centra predloženo je da se Melisa Forić uglavnom usmjerava na naučni rad. Tamara Sarajlić-Slavnić će, kao i do sad, obavljati sekretarsko-tehničke poslove u Redakciji Godišnjaka, voditi biblioteku, te biti zadužena za lektorisanje u korekturu svih izdanja Centra. Neke od spomenutih aktivnosti bi prema potrebi preuzimala i Melisa Forić.

Naglašena je neophodnost ponovnog aktiviranja članova Centra za balkanološka ispitivanja, kojih je u dosadašnjem periodu bilo ukupno 21. U tom smislu potrebno je obnoviti saradnju sa akademikom Idrizom Ajetijem iz Prištine, akademikom Nenadom Cambijem iz Splita, prof.dr. Božidarom Ferjančićem iz Beograda, akademikom Stanetom Gabrovcem iz Ljubljane, akademikom Petrom Ilievskim iz Skoplja, akademikom Radoslavom Katičićem iz Beča, prof. dr. Živkom Mikićem iz Beograda, akademikom Nikolom Tasićem iz Beograda i akademikom Marinom Zaninovićem iz Zagreba, koji su kao redovni članovi Centra bili u sazivu za vrijeme održavanja zadnjeg sastanka 1991. godine.

U vezi sa informisanjem članstva Centra i šire naučne javnosti o aktivnostima ove institucije predloženo je ponovno uvođenje rubrike Hronika Centra u okviru Godišnjaka, u kojoj bi redovno bila prezentovana aktivnost Centra, te izložene smjernice za njegovo buduće djelovanje.

Ad. 2

U kontekstu pripreme novog broja Godišnjaka naglašen je veliki interes domaćih i stranih naučnika za objavljivanje u ovom časopisu, kao i problemi njegovog finansiranja. Članovi Redakcije i saradnici Centra su jednoglasno izrazili žaljenje zbog nepovoljnog ishoda Konkursa Fondacije za izdavaštvo/nakladništvo, tim prije što je aktuelni broj bio u najvećoj mjeri pripremljen. Kao početno finansiranje za ovaj broj uspjeli smo ipak obezbjediti dotaciju od 1500 eura, od strane Instituta za praistorijsku arheologiju Slobodnog univerziteta u Berlinu.

Sadržaj novog broja Godišnjaka je prezentirao urednik prof. dr. Govedarica, dajući potrebne informacije o svakom pojedinom radu koji je do sada pri-

stigao u Redakciju. Sadržaj aktuelnog Godišnjaka sastoji se od deset članaka, tri prikaza arheoloških monografija i dva teksta " In memoriama", te uvodnika posvećnog akademiku Borivoju Čoviću, povodom desetogodišnjice njegove smrti. Većina radova je već pristigla u Redakciju a nedostaju još radovi Branke Raunig, Zilke Kujundžić-Vejzagić, Veljka Paškvalina i Lidije Fekeže. Spomenuti autori obavezali su se da će radove dostaviti do kraja ovog mjeseca.

Ad.3

Pod tačkom Razno razmotren je prijedlog promocije monografije Branke Raunig "Umjetnost i religija prahistorijskih Japoda" i Godišnjaka CBI XXXI-II/31. Zaključeno je da se napravi prijedlog promotora i razmotri mogućnost održavanja promocije krajem ove ili početkom slijedeće godine.

U Sarajevu 19.9.2005.